

兩  
當  
軒  
全  
集

兩當軒集卷第十一

武進黃景仁著

古近體詩八十一首

曉起

昨夜墮朧月今朝瑟颯風琴心來海上客思滿江東館穀  
充新秣園蔬進晚菘眼看時節改愁寂感秋蓬

史邱安之潁州便道見訪

曉聞鄉語驀然驚自起開門握髮迎鬢上吳鹽今幾疊夢  
中楚雨昨三更昨以不及達就平康宿焉若論事業頭顱在莫數兒童  
項領成絕倒行藏同倏佹君爲書記我經生

半載清淮常臥病經年舊雨最相思小山桂樹吟方苦大

海萍蹤聚亦奇按曲尊前推老輩傳經帳後得佳兒下牀  
萬里吾徒志不贈當歸贈可離

綺懷

楚楚腰肢掌上輕得人憐處最分明千圍步幃難藏豔百  
合葳蕤不鎖情朱鳥窗前睂欲語紫姑乩畔目將成玉鉤  
初放釵初墮第一銷魂是此聲

妙諳諧謔擅心靈不用千呼出畫屏斂袖撈成絃雜拉隔  
窗摻碎鼓丁寧泐裙鬪草春多事六博彈棊夜未停記得  
酒闌人散後其舉珠箔數春星

旋旋長廊繡石苔顛提魚鑰記潛來闌前屬藉烏龍臥井  
畔絲牽玉虎迴端正容成猶斂照消沈意可漸疑灰來從

花底春寒峭可借梨雲半枕悵

中表檀奴識面初第三橋畔記新居流黃看織迴腸錦飛  
白教臨弱腕書漫託私心緘荳蔻慣傳隱語笑笑藻錦江  
直在青天上盼斷流頭尺鯉魚

蟲孃門戶舊相望生小相憐各自傷書爲開頻愁脫粉衣  
禁多浣更生香綠珠往日酬無價碧玉於今抱有郎絕憶  
水晶簾下立手拋蟬翼助新妝

小極居然百嬈生懶拋金葉罷調箏心疑棘刺鍼穿就淚  
似桃花醋釀成會面生疏稀笑靨別筵珍重贈歌聲沈郎  
莫歎腰圍減忍見青娥絕塞行

自送雲駟別玉容泥愁如夢未惺忪仙人北燭空凝盼太

歲東方已絕蹤檢點相思灰一寸拋離密約錦千重何須  
更說蓬山遠一角屏山便不逢

輕搖絡索撼垂恩珠閣銀櫳望不疑梳子簾前輕擲處丁  
香盒底暗攜時偷移鸚母情先覺穩睡鴉兒事未知贈到  
中衣雙絹後可能重讀定情詩

中人蘭氣似微醺薌澤還疑枕上聞唾點著衣剛半指齒  
痕切頸定三分辛勤青鳥空傳語佻巧鳴鳩浪策勳爲問  
舊時裙衩上鴛鴦應是未離羣

容易生兒似阿侯莫愁眞箇不知愁夤緣湯餅筵前見仿  
彿龍華會裏游解意尙呈銀約指含羞頻整玉搔頭何曾  
十載湖州別綠葉成陰萬事休

慵梳常是髮髸鬢背立雙鬢喚不騰買得我拌珠十斛賺  
來誰費豆三升怕歌闌扇難終曲但脫青衣便上昇曾作  
容華宮內侍人閒狙獍恐難勝

小閣爐烟斷水沈竟牀冰簟薄涼侵靈妃喚月將歸海少  
女吹風半入林爇盡蘭釭愁的的滴殘虬水思愔愔文園  
渴甚兼貧甚只典征裘不典琴

生年虛負骨玲瓏萬恨俱歸曉鏡中君子由來能化鶴美  
人何日便成虹王孫香草年年綠阿母桃花度度紅聞道  
碧城闌十二夜深清倚有誰同

經秋誰念瘦維摩酒渴風寒不奈何水調曲從鄰院度雷  
聲車是夢中過司勳綺語焚難盡僕射餘情懺較多從此

飄蓬十年後可能重對舊梨渦

幾回花下坐吹簫銀漢紅牆入望遙似此星辰非昨夜爲  
誰風露立中宵纏綿思盡抽殘繭宛轉心傷剝後蕉三五  
年時三五月可憐杯酒不會消

露檻星房各悄然江湖秋枕當遊仙有情皓月憐孤影無  
賴閒花照獨眠結束鉛華歸少作屏除絲竹入中年茫茫  
來日愁如海寄語羲和快著鞭

中秋夜雨

我生萬事多屯蹶眇到將圓便成闕今宵滿意觴蟾盤西  
北浮雲早蓬勃薄暮雨愁夢散絲黃昏坐守猶未歇請從  
樂府歌霜娥肯向愁人鑑華髮伊誰天柱追嬉遨有客鍾

陵去飄忽平生浪說神仙中至此能無愧凡骨三年三見  
雨中秋蒙被掩關愁兀兀反思作客無好懷便有良宵轉  
埋沒羈心卻與晦冥稱夜氣不隨絲管發況今萬里同陰  
晴天意何曾閒胡越寄聲雲將謝雨師我心自有明明月  
初更後有攜酒食至者欣然命酌卽用前韻

狂喜下階趨欲蹶豈意今宵百無闕滿堂酒氣飄氛氲一  
縷心烟起翦勃渴羌奮吸老饕嚼雜沓雨聲同不歇壺觴  
匪惠惠及時快意真無憾毫髮癡童睡醒驚抹眇似有神  
廚運倏忽主人定夢羊觸蔬坐客休驚犬爭骨杖如可化  
愁高寒繩便堪梯怖飄兀何如痛飲隨自然不共浮雲爭  
出沒五更街鼓慘忽沈簾隙看天暗光發一度愁鄉與睡



鄉傾盡千觴已飛越願借君觴更屬君人生幾度陰晴月  
十六夜有月俄爲雲掩因懷孫吟秋再疊前韻

純孤出海犇且蹶流光欲補前宵闕此時大地騰謹聲我  
欲不狂心勃勃穿林一線棲烏翻下砌三甄語蟲歇巡欄  
索句方沈吟又見纖雲卷如髮美人隔帷花隔烟縱好無  
如閒芒忽只將彩翠輪鮮鱗不借華膏鍊塵骨彌畱漸覺  
意慚悽舍去尙餘心仄兀中宵風露淒已寒達曙星河澹  
將沒後時好景還蹉跎便有清歌詎能發遙知故人怱悵  
同雁夜迢迢悄難越相看咫尺不相親眄君如眇雲中月  
十七夜借張秀才嘉會談是夜有月三疊前韻

傾囊斗酒謀竭蹶一任清光滿瑤闕且烹茗茗談千秋搗

叱羸劉詆平勃堂深夜寂鬼不窺放言危論何由歇朗吟  
震屋飄瓦松散步巡階破石髮太息君才竟老蒼吁嗟吾  
意真悠忽誰家長笛聲入雲吹裂巴山老猿骨頓覺長空  
淨沈寥不知方寸起突兀我曹撫運聊蓬行若箇懷奇久  
蕪沒卽看天上層諸光忍待今宵亦終發再逢興會宜招  
尋豫恐離鄉聞秦越送君出門復入門不忍多看是殘月

夜飲孫吟秋齋頭鄰家火發歸而成此並訊吟秋

朝來我讀吟秋詩光燄萬丈騰陸離夜來更飲吟秋酒華  
燭滿堂生白晝居然奪席上眾賓絕似爛額焦頭人似聞  
車轄已投井又報魚鑰先扃門我謂吟秋毋狡詭準擬今  
宵腐腸耳可憐小戶當初筵已見流珠眼芒起起看四坐

方清談霏霏玉屑吹微酣不知泥醉竟胡底側耳街鼓搥  
纔三誰將此意達天聽天笑狂奴此宵病傳呼列缺導祝  
融咨汝解圍惟奏功彤幢紫纛倏飄下中堂哄飲猶詢詢  
一聲礮解天地拆東舍已作阿房宮各將酒面看天色潑  
翻血海無其紅主人危坐掣客肘我奮排筵絕裾走手揮  
烟燭如犇蝨鬼哭神號一回首歸來火速箋游光我酒已  
醒毋披猖倏然火滅天亦曉作詩急訊吟秋老

發鎮陽

又趁西風事薄游冷裝依舊撥吳鉤淒涼道路看人面浩  
蕩川原信馬頭終古遠山埋瘦日半生華髮戰高秋眼看  
如此淮南地獨倚涼天寫四愁

秋夜燕張蓀圃座

白雪吳兒發曼聲華堂九月嘒雛鶯眾中幾點聽歌淚不  
到歌闌未敢傾

屏圍屈膝夜沈沈緩緩歌還淺淺斟喚到尊前非侑酒愛  
他吳語似鄉音

東山絲竹感平生不到中年已暗驚猛省此身爲異客一  
宵歡燕主人情

偕吳竹亭訪珍珠泉

筍輿背秋城晴嵐獻蒼媚鎮日齋樹顛卽是此山翠一泓  
在山麓澄瑩沁幽思仰出泉之常跳珠獨靈異豈其鮫室  
藏或者龍女戲瑟泪迸有聲勻圓洩無次旁或頓足呼湧

出更多致日光耀燿燦烟氣蕩幽闕涓涓嫩玉聲一道寫  
芳賦有客顧我吁此泉蹇遭值品不登圖經名不出方志  
筇屐罕尋探亭臺少位置村童裸來浴牛羊飲成隊置此  
荒僻區乃真憾心事我言良不然此或得泉意高名每難  
副多汲豈非累且與試竹鑪松風起遙吹

鄧家墳寫望

登山畏曛黑山半誰家墳聊復倚枯木悵眺延斜曛華表  
臥草間辟邪繡苔紋不知何公卿料已無子孫俛眎極千  
里大野連秋旻秋陰市地來浩浩風沙昏殘綠掃未盡慘  
澹霾浮雲壽陽瓦一垓淮水圍長闌美哉江河閒有此形  
勢存孫曹始作俑戰守何紛紛天心倦離合地力疲吐吞

方今萬里一地險安足論頗聞守土責宜備淮渦神浸城  
獻三版徙宅空千村頻年苦蝗旱此患匪所云但見途路  
旁野哭多流民造物本無外誰與排九閻長歌不能盡恐  
擾泉閒魂行行復延伫天半松濤奔

秋色

叢叢紫翠作秋英雨過閒階洗倍明若比春花爭得似不  
輸穠豔只輸情

廉頗冢

昔年流涕史遷文抔土今來弔夕曛復用趙人愁不免一  
爲楚將竟何勛英雄論定三遺矢市道交成再將軍終古  
人情只如此試將杯酒與澆君

架頭頗多故人枉書未報作此寄意

強半書來有淚痕不將一語到寒溫久遲作答非忘報只  
恐開緘亦斷魂寄意愧無青玉案封函懶置綠珠盆故人  
若問秋消息落葉蕭蕭自掩門

孫叔敖祠

三時巫覡舞婆娑四壁碑題罩薜蘿循吏傳開名領袖寢  
邱封古廟巖峩生前遇合樊姬笑死後悲歡優孟歌借問  
貪廉何計得芎陂千頃自澄波

重九日雨張守先攜酒見過

萬里秋雲慘不開淮南木落雁聲哀地無一片登臨處

近

山陽無天送滿城風雨來幸有故人能置酒可堪今日不銜

杯已拌醉斷還鄉夢任爾鄰雞喔喔催

午窗偶成

只餘僮僕勸加餐那望園官進食單門館晝閒攤飯起架頭隨意檢書看

遠籬紅遍雁來紅翹立雞冠也自雄只有斷腸花一種牆根愁雨復愁風

烏帽欹斜已戀頭楚天涼思正悠悠中秋無月重陽雨孤負人生一度秋

新僕

新買孤雛瘠不肥未來先爲製寒衣桀驁野性馴猶苦嚙囁方音聽總非爾輩何求惟一飽主人無奈亦長飢憐渠



骨肉猶人子詎忍輕施夏楚威

悼馬秀才鴻運

飄零之楚復之燕檢點遊蹤欲半天只道馬卿常善病誰  
知長史竟無年感君意氣堪千古傷友生平又一篇尺涕  
臨風還自悼他時誰弔酒鑪邊

李繡川招集廣住庵看桂并贈叢輝上人

庵劉頁  
佐建

捨宅空傳異姓王討秋今讓客清狂分明金粟全身現和  
合旃檀一味香佛地逢花宜破笑人天入座且傾觴主情  
卻比醇醪厚何處尊前不故鄉

不用行廚亂雀羣山僧留客自殷勤

上人設  
食甚精

飲從歡喜河

流借饌自摩尼釜鍍分鉢底龍湫千丈雪袖中黃海萬重

雲前遊小話沈齋磬又報花閒已夕曛

話吟秋齋頭次韻

半榻茶烟兩鬢侵一天涼思繫疏襟花貪入道披黃帔時庭  
桂盛竹解畱人下翠禽世態秋雲難比薄交情春水不嫌  
開深誰從藥臼薰爐畔省識斯人萬里心

沙洲行

門前洲渚春水生浩淼遠與淮流平吳艚楚舸泊門下睡  
鄉伊軋皆艣聲經時臥病出門望但見短草搖天青水落  
不知處草青行復枯行人如豆馬如蟻出沒草際行蠕蠕  
若教此地不爲浸豈非萬頃真膏腴長淮樹底渺難辨極  
浦征帆有時見帆影還爭落日飛鼓聲或遞回風便一行

雁帶商飈來散作秋陰滿  
淮甸搢筇獨立何蒼然  
萬里勢落蕭遼天  
客魂久已迷下蔡  
地氣莽欲開中原  
世情生落盡如水  
何必桑田與滄海  
等閒風景傷羈人  
我客茲邦已彌載  
故鄉昨日郵筒來  
石田犂塲生蒿萊  
老親日日倚門望  
試問遊子何時歸  
沙洲行復別伊去  
明歲水生無我住

二十夜

破窗蕉雨夜還驚  
紙帳風來自作聲  
墨到鄉書偏黯淡  
燈於客思最分明  
薄醪似水愁無敵  
短夢生雲絮有情  
怪煞鄰娃戀長夜  
坐調絃柱到三更

尹六丈爲作雲峰閣圖歌以爲贈

出君胷中隨意之  
邱壑圖我懸崖萬仞之高閣  
斷腰破頂

峰狀千繚石穿松雲態各弄君筆頭隨意之丹青使我鳩  
形鵠面生光瑩風塵掃盡出真相土木塊然還舊形蓬萊  
元圃藐姑射攝入橫圖不盈尺雲邪峰邪重復重杳然不  
知圖所終故令閣勢欲飛去位我讀書長獻於其中咄哉  
此客太相逼攬鏡依然舊相識周旋與我成三人畢竟置  
身高處得我曾夜半登祝融鐵笛叫出金鉦紅又會黃山  
看鋪海石壁雲蹤至今在他如匡廬九子天台四明舊遊  
一一歸夢境君畫與我通心靈從今臥遊不復夢但恐披  
圖意飛動五岳尋真願總乖千秋作賦才何用碧海難騎  
李白鯨紅塵漸老嵇康鳳客裏相逢意轉親袖君高手畫  
麒麟若論此日圖中客亦是尋常行路人

失題

神清骨冷何由俗，鳳泊鸞飄信可哀。  
何處好山時夢到，一聲清磬每驚回。  
定知前路合長往，疑是此身眞再來。  
問道玉皇香案下，有人憐我在塵埃。

爲沈莘亭題攬鏡圖

便道三生路不迷，此生幽恨已難齊。  
分行淚碧凝遺掛，積寸心烟裊舊題。  
早歲子荆傷永逝，半生摩詰判孤棲。  
黃金買盡渾難鑄，畱待他年紫誥泥。

梁可堂爲作山水冊因題其上

賤子原多癖，先生自不閒。  
夜歸江上夢，晨點雨中山。  
寒翠自然積，野雲何處還。  
願從幽絕境，對結屋三閒。

畱別正陽書院諸生并懷邵二雲編脩

往歲青門客曾爲此地師斯人眞世表而我亦心儀暫釋  
上丁萊仍然太乙藜諸君應悵惜未得久追隨

好事多君等時來載濁醪誦聲聯四舍談緒引中宵不厭  
箕虛位將毋木下喬經師未岑寂影質且休嘲

不是周旋久誰知作別難懶驚邊睡足飲詫兩腸寬此日  
勤根祗他時望羽翰生平求友志休作世情看

送送一何遠秋原卍地陰道存無聚散身在任升沈歲月  
驚將暮雲山黯自深停車重爲別其此百年心

贈程生人中

生年十五六文采亦已高譽雖籍籍其氣靜不挑淬銳

比千鏤燦華爭瑤瑤眾中得吾子如得綏山桃孔融有小  
友王充多稚交亦見古先哲投分懷英髦我獨何人斯敢  
以年自驕抗顏已彌載無術相蒸陶今方與生別款款觴  
醇醪請我贈一言我意非徒褒我昔三五日壯氣千星杓  
自擬羅預閒置身惟雲霄久之竟無驗譽者今已嘲尊前  
有覆轍敬矣毋相遭但聽我言苦勿恃君顏韶

何事不可爲二章詠史

何事不可爲必欲爲人子異地附瓜葛他山託喬梓乃知  
腥羶所萬物任驅指螺贏多微蟲黎邱足奇鬼東海一逐  
臭西江詎湔恥甘心謂人父生者良已矣所苦泉下人他  
鬼奪烝祀依然見斯流被金而佩紫更有呼父人相步後

塵起父人復人父誰非竟誰是

何事不可爲必欲呼人師觀其用心處豈在道義爲昌黎  
作師說嗶嗶費繁詞誰知矯枉甚流弊爲今茲後堂列女  
樂前庶陳牛衣位置雖不一市道均無疑桃李本春卉向  
暖固所宜竊恐白日光難遍傾陽枝今朝羅雀處昨日橫  
經時聚散在轉瞬令我長歎咨蕭蕭子雲室寂寂康成居  
茅茨且休翦抱經聊自怡

題可堂印譜

昔聞昌黎言爲文須識字俗書動譌謬焉論古書契所以  
有心人索古具深思觀其變態中綽可見根蒂伊惟印信  
作旨哉得書意繆篆雖縱橫締索極精邃銅斑玉血中一



綫斯文繫重不侔鼎鐘功只記姓氏人各自爲佩識字聊  
一二奈何俗儒舛此道亦捐棄私心自增損屈體鬪纖媚  
誰歟出攻苦相與究疑義邇逢吾可堂於此見三昧作之  
不甚惜求者鮮不畀欲令一筆譌千金不回眎裒然成一  
編倉斯吐光氣波磔必老蒼慘淡出平易每於半黍間欲  
作千丈勢觀其用心處實欲功斯世吁嗟俗眼多曲說中  
肝肺落落趨風塵何人辨能事西兵方凱旋羽書走星騎  
將軍要勒銘軍中孰書記此事非君誰道遠莫能致三歎  
聊贈言藏鋒待時至

壽陽

花草何須怨楚宮六朝殘劫總成空地經白馬青絲後山

在風聲鶴唳中終古英靈走河胃此閒形勢障江東我來  
只訪劉安宅一片斜陽古廟紅

八公山

半壁淮南翠撲天振衣絕頂勢蒼然忽驚雞犬入雲去遂  
有風禽來耳邊兒輩偶然能破敵才人何必定成仙登臨  
去住終爲客日暮空歌招隱篇

渦水舟夜

爲憐渦水照人清素舸輕裝歲暮行但見流民滿淮北更  
無餘笑落陽城月臨霜草寒同色風旋冰花凍作聲如此  
天寒途更遠扁舟一艤若爲情

題潘寄湖照

荻花疏雨柳絲風  
白板船掀箬葉篷  
活國活人雙袖手  
暫題詩在水雲中

料理烟霞遣簿書  
斯人用意未全疏  
憐渠萬頃無垠碧  
不鼓巴琴起大魚

雪夜至亳州

信帆溯清渦  
歲晚水源閉  
適我將舍舟  
風雪塞天地  
襍被輕易肩  
書篋愛難棄  
絮帽不煖頭  
迎面玉龍戲  
夜色斂郊垞  
一白了無際  
虛光紛四來  
極眺快心意  
如乘剡溪船  
興發忘所自  
如襲蔡州軍  
銜杖走精騎  
一髮見南譙  
界天明眸睨此邦  
古都會人物  
挺殊異當塗  
斯沛豐三分  
推吉利文采擅  
一門雄威振  
當世霸圖荒  
已陳英風渺  
焉逝鬱我

懷古心亟就市沽醉殷勤愧館人幾訶怯關吏解裝然溼  
薪孤吟聊擁鼻急雪一打窗空宵客魂悸

渡河

一夜朔風吼河聲怒似雷上流冰動岳亭午日飛灰浪挾  
羣靈走沙浮浩劫來懷中無白壁逕渡不須猜

題濟寧驛舍

烏烏凍角戍樓空隻堠雙亭歎轉蓬今日倦遊過濟北何  
人長句擅山東欹斜舞影雜聲月觸忤愁心馬耳風明發  
南城驛前路去程都在雪光中

馬上逢雁

我方北去三千里爾是南來第幾羣來歲北歸如有意深

聞書札恐煩君

東平

如繩大道走晴雷似水征輪起薄埃山勢盡朝東岳去地  
形都向北平聞絃歌鄒魯仍儒俗指顧燕齊想霸才快眺  
頓忘行路苦一鞭捎下亂岡來

東阿項羽墓

將軍之身分五體將軍之頭走千里擲將贈友歡平生漢  
王得之下魯城可憐卽以魯公瘞想見重瞳炯難閉至今  
燐火光青熒猶是將軍不平氣昔奠絮酒烏江頭知君毅  
魄羞江流懷古復過彭城陌知君英靈愁故國兩地招魂  
不見君卻從此處弔孤墳美人駿馬應同恨多少英雄末

路人

東阿道中逢汪劔潭

三千客路行未半昨夜始宿東阿縣  
曉扶殘醉登雕鞍午向茅檐餐麥飯  
擔夫逆旅相弟兄瀟灑酒行裝子無伴  
門前郎當聞馱鈴有客停車捲車幔  
裘馬雖爭入蜀都容顏畧似游梁倦  
凝眸審得故人是失喜抱持狂欲旋  
大海浮萍聚亦奇各拂征衫更相見  
五年相失江淮間舊雨星飛尺書斷  
誰知馬潤塵坑中千里遊蹤牽一綫  
我來潁亳君淮徐征程似水東西判  
天公若慳會面緣早晚何難一程先  
問君此行胡爲哉懷策欲向金門獻  
多時苦作飢鳳號今日應隨景星見  
我簪秃管亦沓來相從願識金臺面  
斯遊

端合決行藏親老何堪久貧賤此邦去歲遭黃巾過客至  
今猶色變時時林鳥驚虛弓往往村墟斷朝爨窺囊縱不  
憂盜賊爭命何曾識刀箭逢君始覺膽氣粗獨客愁心若  
冰泮復憂天際堆同雲只恐前途飛雪片畏寒偏欲衝寒  
來我輩謀生不如雁今宵且作竟夕談十千沽酒寧容算  
從此千山並轡行車中更乞新詩看

曉行

星光暗到客行處霞色起從天盡頭小店欲隨平野去殘  
燈都被曉風收絕憐鐘破將歸夢可奈霜欺欲做裘喔喔  
荒雞最無賴雁聲又送一鞍愁

高唐

古意爭如客意多，迎風伏軾快經過。徒聞上客工長笑，曾說州人最善歌。  
淳于髡蘇駒故里道旁皆有碑艸沒龍頭應有塚，沙枯馬頰已無河。臨流亦效宣尼歎，吾道從來奈命何。

德州

江鄉風景眼曾諳，近水孤城一駐驂。百斛估船來日夜，千檣漕艘自東南。倡歌殢客調銀甲，市酒澆愁瀉石甌。人馬同時渡河去，夕陽吟思最清酣。

景州道中戲呈劔潭

未獻長楊賦，先經細柳營。前途多姪女，愁聽數錢聲。

獻縣汪丞坐中觀技

主人憐客困行李，開觴命奏婆猴技。一人銳頭頗有髯，喚



到筵前屹山峙鎮頤解奏偃師歌斂氣忽噴尸羅水吞刀  
吐火無不爲運石轉丸惟所使上客都忘葉作冠寒天倏  
有蓮生指坐令棐几湘簾旁若有萬怪來回皇人心狡詭  
何不有爾爲此技真堂堂此時四座羣錯愕主人勸醉客  
將作忽然墜下趨奚奴瞥見庭中飛綵索少焉有女顏如  
花款闔循牆來綽約結束腰軀瘦可憐翻身便作緣竿樂  
初凝微睇舉高縷高縷見  
鄴中記欲上不上如未能失勢一落似  
千丈翩然復向空中騰下有一髻拋畫鼓棖棖節應竿頭  
舞驀若驚鳶墮水來輕疑飛燕從風舉腹旋跟挂態出奇  
踏搖安息歌逾苦吁嗟世路愁險艱爾更履索何寬然鼓  
聲一歇倏墮地疾於投石輕於烟依然娟好一女子不聞

蘭氣吁風前我聞西京盛百戲此雖雜樂猶古意石虎休  
誇馬妓書杜陵雅愛公孫器螭鵠魚龍亦偶成戲耳何須  
蕩心氣狂來逕欲作拍張我無一技爭其長十年挾瑟侯  
門下竟日驅車官道旁笑語主人更觴客明朝此際孤燈  
驛

河間旅次次壁間韻

北風古道走黃沙落日高城隱暮笳地枕滹沱還似礪人  
居燕趙慣如花愁聞石調邊兒曲怖聽雷聲夢裏車不少  
道旁遊倦客也言歸思遶烟霞

原韻一夜關河斷飛雪不容清夢到烟霞

趙北口

居然楚尾吳頭畫忽向燕南趙北看爾許離心攀不得十

三橋柳挂蕭寒

乙未除夕前五日筇河先生偕集陶然亭分韻得

影字

蒼精奮長鞭元武縮其頸豫從黑道中捧出熙熙景下土  
方在迷達人已猛省九衢足輪蹄晏歲益驕騁豪奴走華  
餉絡繹鬪豐艷誰憐天地春汲汲爭俄頃或亦強解事消  
寒燭能秉重幕圍氈爐怕使風吹影陽春縱有腳不詣坐  
蛙井吾師古沈冥展序動遐憬指點城南隅一片蕭涼境  
此可羅古歡亦宜散盃皿烟直流飛薨天空障崇嶺春魂  
呼欲出春意撩猶靜上座歸老蒼分席閒臞瘠星散人海  
閒環顧倏合併清談正霏綺四座忽引領夕陽走山翠亂

撲到軒屏吸入深盃中眼花旋相凝酒面蒸餘霞一縷吐  
殷頰引杯纔說申問夜俄及丙起看天上星已聚光耿耿  
東皇佇靈驂歡意相與永壽考兼榮名自錫不須請玉山  
漸頽唐我意卓然警影纓上國遊醜士類山瘦蕭蕭吟露  
蛩兀兀揀書炳裹身熱塵中百法不化冷豈期北海筵得  
列西園梗顧眄一生輝華心渺思逞緹室飛纖灰春力一  
何猛可知天地心不在干桃杏奈何嬉春人必待月如竊  
賤子工談俳羣公任歌郢作賦雖不成吾以志吾幸

棟鄂烈婦輓詩

舒相國第六子婦夫死自經以殉

黃閣差我倚玉京舞鸞中道阻哀鳴九泉誓共郗生穴一

慟眞崩杞婦城

天子動容旌赤管相公收淚慰蒼生  
冰霜那得心如許曾向穹廬萬里行

青羅帶子角雙垂錯認人間續命絲  
拋向空梁愁玳瑁殉歸香土化騰脂  
可知就義從容日卽是同心暈勉時  
身後不須封石窳西山高並冢纍纍

哭龔梓樹

相逢兩小意相親轉眼青山哭故人  
到死未消蘭氣息他生宜護玉精神  
拋殘小劫初三月正月初三日卒看盡名花二十  
春怪道年時頻夢汝半身霞翬禮羣眞

十年舊雨阻燕雲把袂俄驚冥契分  
一喘夜窗猶待我兼

程朔雪似因君

時予至都甫十日

每憂謝弟年難永不信龔生蕙

竟焚回首荆南讀書處滿山猿鶴弔斜曛

兩當軒集卷第十一

兩當軒集卷第十二

武進黃景仁著

古近體詩四十六首

平定兩金川大功告成恭紀

謹序

蓋聞六月歌于風詩九伐秉自周禮堯天至大聿興丹水  
之陣舜治無爲亦事有苗之格稽古哲王未嘗不以武戡  
亂命師用邊是故兵也者聖人非樂之也所以讐不庭除  
不軌救無辜正大憝也抑或聲教有不及暨撻伐有莫可  
加自古迄今未有并區兩大齊軌萬國德敷之而威若威  
振之而卽舉豐功偉烈如我

皇帝者矣惟兩金川蠢爾餘孽雜谷荒裔金沙穢流馮其



遐阻肆乃狙賊急則相倚如狼狽之一膽緩則相齧狀蚘蠶之兩頭曩者

王師奄征瓦解冰釋

帝惟天不偏覆日無私照討叛示武柔服示懷虔劉焚蕩有未盡焉雨露再滋陰沴潛作養其蝥蠹之毒侈厥梟獍之志于是

天子赫焉西顧元戎肅將

天誅有征無戰不逾七旬之期一勞永逸略俟三年之久孥其老弱劓其巢穴頡利之首函焉先零之頸繫矣捷旌星至羣懼雷抃以乾隆四十一年二月大功告成百禮咸備史官載烈以筆詩人著美于頌彼夫漢使開邛徒通竹

杖之利魏臣賦蜀惟誇蒟醬之美臣草茅下土夙黯研述  
每陋前言或多未當謹抽極思之致敢附奏御之篇不以  
鋪張爲主而一歸之

聖天子彰彞耆定之至意其辭曰

聖不得已亦用兵于功爲造德則成我

皇御宇奠八紘地彌天區廓合并誕敷

文德恢何宏有不格命始用更九黎三苗從薄征二萬餘  
里條底定蠢茲金川俗倣倬雜谷沃日紛殊名在昔負固  
喧蚊虻于鏌一掃無長鯨坐收荒徼歸王程唐皇駿業垂  
千正工歌聲詩賢誦廣

帝曰伐國謙斯亨其地吾宇民吾屯渠魁已得他奚爭越

年逾紀孽載萌耿以爝火抒櫜槍四家十姓先內傾猗會  
披猖誇僥蹙昔者款關今敗盟示威罔讐誠罕怔

天怒赫斯開九閔桓桓禦武厥命卿類造

上帝告

宗祊往救赤子離阱阬天將位列西金庚上掩方召卑韓  
彭

命惟三錫師尙貞公徒貝綬徽朱綬妙簡七萃聯五營兵  
車四出麟隱軛

金符節郎剖玉瑛牙璋赤炎輪芒瑩砮開武庫兵自鳴夏  
摩出火聲錚錚十星斧鉞隨參橫靈旗珠斗畫牡荆烏號  
越棘兼雕解鹿盧筒次如連瓔雍狐瑞鞞光浮晶神矛跌

蹌初降嵒山立雲委出天棖元戎拜

賜身爲輕夕不家宿辭

帝城式董戎寄揮長纓維時羣醜方蕩蕩思戟螳臂當雷  
轟戴山元蚰觸柱靖伊恃阻險山嶢峭毒淫霧水流澗滌  
百飛不度愁羌鴉漆身披髮形怪獐猿狙雜隊工趨趨升  
降峒壑如履坪用敢背恩凶貫盈

王師奄至驅獐麋霍若天外影旌復疑地中鳴鼓鉦驚  
逋竄竊同睨睨甘泉日夜來捷音

至尊洞燭軍中情沈謀密斷醜莫偵萬里決策無搶攘六  
軍用命忘有身羊腸虎棧千盤縈懸車束馬登絳嬰前軍  
鑿石雷般磅後隊伐木猶丁丁或手接樹鬻纏紲雁行魚

貫交推擊每逢一險百巧呈絃聲霹靂山砰訇忽或萬炬  
然火棚地雷慢砲豁谷豁火雅火堆而火往烟飛石散開  
崢嶸游魂灰滅不及瞪突鋒冒燼紛投誠頸微絃索髡鬚  
攀旄則負杖兒束縲曰見天日逃國圖示賊巢穴指掌明  
左屠右翦怯孰敵斜攻閒發窮支撐迎刃桀解無堅慳斷  
虵首尾交擊撈如拉朽株如建磬首俘厥父磔國門獲生  
累累娃兼嬰元凶膽裂心惛惛枝頑助惡陰使令負嶠困  
鬥且束頸延死一息藏井螿

天威霆奮疾復勅鏟削虎穴薰鮑鱗彌雲布天畢罔不  
使蚊睫逃螭蜩鏡奏月捷喧鏗鏗降王銜壁軀裸程窮鱗  
戢甲俛就烹頃刻谿阻皆蕩平天人中外喜則均

帝惟

列聖威爽馮聿謁

陵廟駿玉衡五雲松栢飄醇醑祠官奉虔陳特牲祇

告武功於赫聲陬維二月春英英旋

蹕南苑韶景新敬奉

聖母巡岱行

慈釐茂育天禧迎千官扈從鏘璆珩錦花陌路飛羣鸞

慈顏顧喜天回榮岱宗鬱盤何拂縈青氣上屬宮闕宏吉  
日刻瑞檢紫璫勒成紀烈遐百禎呼

萬歲三響震呶江淮九節抽茅菁嘉禾六穗聯一莖互七

十王功孰京

六飛載駐鸞和譽

素靈闕里輝煌煌行告成禮宮開鬯儀曰三獻奠兩楹祭  
藻舞戚奏咸諤禮成進講羅諸生從容六籍相簫笙凡百  
嘉瑞惟

帝慶西師按候方凱旋長驅壯士歌慨忼虎臣解甲懸弢  
弮去時苒柳歸霏霏

帝曰勞矣觴兕觥策勛舍爵予實政凱樂告

社金石鏗史官載筆書藏宸洗兵甘雨傾蓬瀛邊徼永絕  
纖塵驚雕題鑿齒皆王人在上曰幪旁曰帡億萬斯載歸  
皇清

平金川鏡歌十章

謹序

皇帝以兩金川羈服在昔並隸土司未幾狡焉繹騷違我邊吏抗我顏行大軍進討五載而將軍阿桂實成厥勳于是祭告省方獻俘班爵官有典常自收準噶爾部二萬餘里以來

聖武丕丕禮樂爲昭復茲咸覩赫矣那矣其軼於前代者也

臣伏見

聖主威靈聲行仁漸義脩有任賢將之明除惡務盡之斷所以耆莫大之功有不匱之孝思格于上下百神所以專爲廣溥之恩誕受無疆之福宜被歌詠用賡休烈擬爲古樂府饒歌曲凡十章章舉其目雖不足仰希作者風節庶幾鬻鼓軒舞之義其辭曰



帝聖武期會昌誕靈極綏八荒吹萬亭育浩括囊自東西  
南北咸丕享弦弧剡矢

皇威赫張不遐砥屬率格命有不格命

帝曰予肆正眇筭儼騷曷靖再克捷永底定功之成惟

聖謨恢天綱奠神輿狡蟲畢精民蘇泮洋洋敞會圖

聖武揚美大功也

賊何巢巢惡木波滔淫豕咀蠱是生梟獍孕虺蝮謂天視  
遐莫我劉劓有狙有獷黨彼凶族

王師霆奮抑何速解無脫弢矢守箠斬關犁庭不可以谿  
谷擗君蠕蠕就罝罝巢之馘眾雛覆一雛爭網漏疏目反  
爾鼠噬呼穀穀爾父國門有顯戮

戡賊巢敘始事也

異命申命定西載典圭炎禡靈旗惟參四星實副之正邦  
除懃汝實司詔若緩急若先後橫絕萬里決策汝授尙赫  
赫禦武

皇靈是佑廣廣爲夏滔滔當春往沛時雨清沴氛膺福艾  
曰虎臣

異命申予阿桂定西將軍印豐昇額明亮爲副也

勁旅發雲駸駸甲霜野艾鄧林天劔倚月羽森蕊犀陸截  
輕鴻波沈火牛燧象孰敢攖攢度月在箕畢軫翼迅森施  
爛惟此千隊萬騎

天子所命元戎是寄誰謂小蠢無役重兵我

皇帝武惟斷乃成枝駢九校鱗比七萃岳移雲動雞犬不  
鳴吠遶井絡回參旗從九天壓雪山以摧彼頑敵應方  
蚩蚩

勁旅發飭滿洲火器營赴軍也

不五日烟霾昏翳川霧岳潛游魂前跋後顧據凶門五日  
捷展陽耀疾雷破山蕩青微倦虬讐伏孰趙懋繫組貫索  
他他籍籍曰吾儕匪敢反側彼狡酋實僭厥德嗟凶黎爾  
禍洵自貽疇昔來乞命國如累卵危爲汝萬里而懸師今  
反黨惡自令翦滅爲五日捷猛何疾蚬蠶兩頭斷其一移  
軍進哉急勿失

五日捷復取美諾也

軍宵行露泥泥豐隆收聲雨新霽聞行疾發塵不起摩天  
羣峭礪百重一硯告傾百屯燬電捲列柵呼聲殷空羣凶  
倉皇殲軀夢中餘者突鋒冒燼飛走窮一日克收三年功  
因建瓴勢撤彼外險乘霧直上惟將軍敢奏月捷排九關  
帝曰嘉哉繄汝勤光若先烈用集勛

將軍奮阿桂克木思工噶克丫口豐昇額平遜克爾宗  
也

大集師聲赫張發醜窟穴傾蓋藏賊恃犄角礪棧森相望  
有黜一窪居中央蟠根苞柝厯紀生豺狼桓桓定西區畫  
緘以詳環龜兼舍迅擊榜穴地斷臨閣泗淵絕飛梁倬若  
援逕犀截矯翼難翱翔然後曳柴然炬魚貫浮沙囊地雷

殷發烈崑岡桀解支體從空揚迷魂竄竊窮奔亡中天秋  
月懸明光

大集師克勒烏圍師悉會也

渠魁得從鬼區困獸且鬪僵負嶠師兩路集百險俄蕩除  
彌雲羅布天羃鯨波涸鷗竇塞韃束靡聞然後渠魁乃得  
悚猓猓縻尺組勅者庭孰爪距孰咀遠克負斯不遑處驅  
白狼縛旄牛蠻觸盡欃槍收浩垓北寂無求置一埃永干

秋

渠魁殲平噶喇依獲賊酋也

侯社宜奏愷樂靈旁皇顯煜燿九土式奠百族咸若俘瑤  
玉以歸罔有佚惡

帝曰子一人孰克武上天降祥光祐我

烈祖受洪捷赫明明以罪人得祇告於寢成惟

列聖丕顯我

皇帝慶

俟社宜行獻俘禮也

帝德廣運六合寧耆定武功文用經格苗戡黎除不庭合  
內外一徹障屏不占九譯趨明廷永奠四極贊三靈西鷄  
東鱗仁雲亭百神受職惟德馨含生負煦各遂形昭符嘉  
貺洞秘扃神泉帝漿傾渌醪澤物物解孰使令厥挺朱草  
枝瑞萸協契圖牒爛雲星握樞運符享遐齡

德廣運垂無窮也

平金川饒歌

十章之七

王會車書萬國通軒弧舜戚本同功從知地輔天衢外只在堯封禹甸中

曾傾西海蕩流沙撒馬花兒盡一家偏是旄牛青徼地卻煩兩度拜輕車

蠻烟腥峒鬱啣嘈毒水金沙界作濠忽報將軍自天下一時齊擁白狼逃

月黑軍星薄降婁漫山慘霧嘯鵠鷗天教小醜延殘息暫放奇功五日收

驚藏釜底剩遊魂焚女蠻君棄壘奔一夜六騾逃不盡自牽草索到軍門

千層礧礧破雷轟百險俄從指顧平手縛樓蘭獻

天子不須高築受降城

一柱標銅再勒銘南人從此奠威靈請看四載懸師處十里桃花五里亭

春感

二月不青草蕭然薊北春千金無馬骨十丈是車塵氣盡初爲客心空漸畏人道旁知幾輩家有白頭親

亦有春消息其如雨更風替愁雙淚燭對語獨歸鴻宮闕自天上家山只夢中東君最無賴不放小桃紅

卽席分賦得賣花聲

何處來行有脚春一聲聲喚最圓勻也經古巷何妨陋亦



上荆釵不厭貧過早慣驚眠  
雨客聽多偏是惜花人絕憐  
兒女深閨事輕放犀梳側耳頻

摘向筠籃露未收喚來深巷去  
還畱一堤杏雨寒初減萬  
枕梨雲夢忽流臨鏡不妨來  
更早惜花無奈聽成愁憐他  
齒頰生香處不在枝頭在擔頭

送何數峯之輝縣

輦洛才名動綺年識君風雪古  
幽燕情如春水桃花後游  
其天津析木邊獻馬客多金  
長價好龍人少畫銷煙歡場  
只意常相守忽報臨歧始惘然

行拋市上荆高去去訪山陽  
稽阮游笑我因人常苦熱羨  
君前路正迎秋臺空獻落千  
年響地古泉爭百道流莫爲

登臨忘回轍有人凝睇鳳城頭

翁覃溪先生以先文節公像屬題像李晞古筆藏  
夏邑彭春衣侍講家此先生屬山陰朱蘭圃臨本  
也

我生後公不卅世公之斑斑無復存西江巨派遍海內摩  
圍衍脈枯生塵家風鮮嗣愧才下空緬仿像勞心魂北平  
學士示我畫我祖生氣今猶新映之蒼壁太古色洗以淥  
水空天痕雙睛熊熊裂積鐵廣袖落落生長雲深山大澤  
百秘怪坐朝詩祖來如奔何人作繪鑄生面李待詔唐超  
不羣明知畫以人不朽想見下筆工苦辛匡廬大好讀書  
處世閒邱壑卑何論可憐一與人事積毀消骨憂殉身

文章光燄在天地，絹素慘淡磨朝昏。先生今世巨手筆，後先作者通精神。賦詩還畫九頓首，莫乞餘慧張衰門。願從大匠請繩墨，華胄敢恃圖中人。

桂貞曲爲潘蘭垞賦

桂枝中抱辛較甚，蓮心苦剖作琵琶。槽切切能私語，不比紅豆枝。祇按相思譜，過客傾耳聽。繁絲激悽楚，曲終人馬喧。此別成千古，窅窅墓門風。霏霏陌頭雨，攀樹迷故柯。尋聲何處所，時見楊柳花。彌漫撲空舞。

顏魯公名印歌

顏家世寶魯公印，我初見之光奪矚。倚天柱地赤文兩，銅八分廣徑亦如何。論倉籀孰秦漢，招搖輸金造化鑪。公之

靈爽照千古洞天琳腴結蕊珠英英握拳透爪力侃侃正  
士端人書想當印印錐罷畫小署紙尾猩紅硃初疑舐罷  
盧奕面淚痕血漬交模糊不然老臣忠義膽一腔色正離  
方朱當時河北廿四郡大名獨邀天子呼世稱魯公不姓  
氏況千載後鯁生乎口噤遑敢以手摸觸著恐犯蛟螭衙  
頗嫌官誥尙書印九疊盤曲傷形模雖然物以人重耳以  
此較彼徒區區詩成更乞印一紙佩作肘後龍威符要扶  
心臟作正氣魂夢不敢流荒誣復愁雷電忽下取神物一  
失如亡逋

得稚存淵如書卻寄

秋窗夜涼燈一粟日南坊西數椽屋客心羈孤不可論忽

有故人書在門書詞悱惻紙黯慘曾洗巨浪傾崑崙

寄書人會

覆舟於河

河關阻越兩年別展翰披緘轉愁絕洪生倔強百不

諳只解故紙驅銀蟬自餐脫粟厚親養儉歲襍被遊江潭  
孫郎下筆妙心孔百煉枯腸瀉真汞寄我新成病婦詩不  
特才豪亦情種鶴籠鳳笈兩不聊憐我塌翅爲解嘲老親  
弱子感溫問古意分明見方寸入世無妨醒是狂謀生敢  
道貧非病燕山九月飛雪花日日典衣歸酒家聞鐘偶一  
攬清鏡面上薄已汗塵沙插標賣賦愁絕倒臣朔苦長時  
不飽織錦偏輸新樣工論文每歎清才少春風野火句全  
刪今日長安住較難故人遲我作長句須在匡山讀書處

十月一日獨遊臥佛寺逢吳次升陳菊人因之夕

照寺萬柳堂得詩六首

風色薊門寒蕭條歲又闌六街飛蓋滿獨客廢書歎旅食  
謀歡少清遊覓伴難朝來逕孤往瘦蹇勝雕鞍

崇南坊角路側帽自行吟市盡天圍堞霜清寺出林宮雲  
荒碣石臺日澹黃金幸有故人共慨然談古今

長安某局外高臥羨能仁

寺佛作  
臥像

古碣忘年樹虛龕積寸

塵閉門知客少退院識僧眞便欲肩行李從茲寄病身

夕照何年寺龔生殯此閒

龔梓樹厝所命  
僧置酒奠之

遺文銷白蝨畱

骨待青山杯酒生平盡經年涕淚漚紙灰風動處送我出

禪關

綠野名園舊黃扉上相開連天起韋杜拓地館鄒枚事往

寒雲白林空野鳥迴老丁鋤菜急不問客何來

欲放登高目平岡正落暉穿蘆時見帽攀樹每鉤衣雙闕  
明金爵羣峰走翠微南飛數行雁目送思依依

笥河先生齋頭觀馬負圖雨竹障子偕家葯林作

東土美竹植南邦富雨產我本東南人見畫豁雙眼兩年  
塵土燕之陞此景那得移於斯先生指畫語奇事關中老  
兵名畫師短衣縛袴走盤礴雄心健腕揮淋漓綠雲下垂  
天雨泣百萬籜龍渾雨立急漲穿根爭道流疾風捲影遮  
山入喧聲恍挾驚雷奔餘氣欲撲高堂溼從師昔游江之  
干三年看盡江南山無山不竹晴固好看雨益復開心顏  
沈思各已成往境指點忽落圖中閒吾家葯林亦工竹見

之卻立百回讀平生未嘗輕許人歸臥夢繞瀟湘曲我不  
識畫賞以心爲引大白張清琴何時雨中竹裏數椽屋坐  
我朗誦還山吟

贈楊荔裳卽寄酬令兄蓉裳

五載游君伯仲閒相逢笑我鬢先斑且傾燕市飄零酒坐  
看邊牆紫翠山彥重珠光輝日下茂沿竹韻振江關思兄  
有句吟春草我欲相隨夢別顏

昨宵書札來江表苦爲離居弱季言只恐才名爭法護不  
憂文筆遜平原冰天作客年方綺晏歲懷人日易翻早晚  
薦書同北上斯人豈合久林園

故人憐我頓塵中溫語頻番慰寓公百鍊妖金空自奮飽



餐癡蠹有何功名心澹似幽州日骨相寒禁易水風拭眼  
雙龍起騰躍未憂吾道竟終窮

元瑜筆札仲宣詩眾手傳觀絕妙辭萬事不如知己樂一  
燈常記對牀時雨雲翻覆隨流輩裘馬輕肥讓市兒可奈  
離心爭一寸每逢君弟輒相思

訪吳竹橋

敦牂季秋月文戰各云罷君時抱微疴我亦整游駕訪君  
來琴川燈火官河夜人話竹閒堂舟維水邊榭我師青門  
邵於君屬姻婭丈行弟畜我愛我百從借十年願見心一  
夕快傾瀉才大工軼軻養深得蘊藉促膝未竟談催發舵  
工罵袖君一卷詩讀向疏篷罅骨必推風騷韻或壓陶謝

百家入環中騰躍卽變化生平詡柔翰矜心爲君下離緒  
琴莫剛流光駛堪訝失計人海游郎當馱鈴卸君來已先  
我拊掌笑相迓析津候

鸞輿金臺詢馬價作賦聲摩空斂氣若閒暇失勢副車中  
惜此穿楊射君才且復爾賤子敢悲咤所恃惟毫錐作計  
已居亞君心絕坦夷見慣了非乍差喜塵渴軀冰飲闕隆

夏朝吟椒花舫

朱笥河先生齋名

暮觴紫藤架

金振之寓齋藤花甚繁

頗覺

師友懽歸鞍已忘跨誰知緒風起勢欲傾嵩華日色灰可  
憐雪片大堪怕鬢怯酸霜侵車愁凍塵砑酒價如山高囊  
空艱一貫偶然眎交衢絡繹走鞍靶徹侯罷朝宴丞相歸  
宵假鞭影搖珊瑚衣香散蘭麝歲暮多饋遺包纏雜巾屨

感此游子心悽然返羈舍憶昨聞君言不如且歸稼款款  
聯親朋依依話桑柘但得蓴絲羹何羨牛心炙苦語如晨  
鐘三復味勝蔗閱世久益深君言豈余詐不投班生筆終  
屈淮陰胯各負名山期何時了婚嫁

病中雜成

凍蠅僵壁飛無力雨鶴棲松翅倒垂病淺病深吾自驗酒  
人疏到酒杯時

寒甚縱無衣可典貧來猶有飯堪加賤軀定不干天忌閒

看窗前霧凇花

時木介  
數日

王蘭泉先生齋頭消寒夜集觀鄰湛若天風吹夜

泉硯作歌

銘八分書下小行楷鐫鄰湛  
若三字并明福洞主小印

門鑰收魚漏停箭通政高齋夜張譙燭輝沈沈酒氣濃半  
酣示客端溪研潤結雲腴細裊絲紫蒸玉暈光凝片有銘  
有印了不疑明福洞主之所遺我公得此走萬里從征十  
載軍中攜雷硯電燹奪不去蠻烟惡溪沐浴之開滕發匣  
起光怪傳觀四座羣嗟咨研乎酌汝樽中酒似汝遭逢信  
希有昔伴西山義士家今歸東觀名儒手當時海雪稱畸  
人棄家亡命走鬼門摩挲銅柱度藤峽經過桂管窺五屯  
藍胡侯槃雄四姓花面蠻姬更驍勁天女天魔舞隊奇阿  
夷阿等歌妝艷鄮生翩翩書記才陸離魂詭相輝映是日  
猺獍屢跳梁生入虎穴覘覆藏記成赤雅將有用研乎辛  
苦曾同嘗一身終殉家國難片石空畱姓氏香何如我公

佐

熙代嵩華森稜見風概

天子命佐征南軍讀書長歎貌貅隊馳檄纔清驃國烽回  
軍又撤旄牛寨詩就常分豹略餘書成總出山經外想當  
草疏還飛文軍聲如雷寂不聞精瑩研石不盈尺墨瀟灑  
遍天南雲歸來論功爵不次研乎與汝同策勛公之英名  
動

明主四海傾心屬公輔會看一片墨池陰不日化作蒼生  
雨我生萬事嗟蹉跎廿年人墨交相磨書生報國徒誑語  
我不如研何其多傳聞同時有綠綺身後售歸錦衣子卽  
今把玩知誰人何年劒合延津水惜哉見研不見琴購得

我欲傾千金持將獻公操一曲颯颯天風泉夜音

丙申除夕

闌珊燈火鳳城隈自擁氈爐引凍醅銀筓怕翻商陸火消  
殘心字不勝灰

一歲似風吹劔上百憂如影墮燈前車聲已有朝天客不  
及嵇康好晏眠

痛飲呼盧病未能鮮衣炫服態堪憎今宵未免深閨夢一  
閒輸它退院僧

兩當軒集卷第十二

兩當軒集卷第十三

武進黃景仁著

古近體詩六十九首

丁酉正月四日自壽

是日同壽者有溫景萊朱大尊楊荔裳共余四人溫舍人

汝适爲置酒  
借舫齋中

綵箋分擘燭分持四座交成自壽詩元子敢誇庚午順余生  
時郎中多恐甲辰雌青蒼路迴誰先達草木年深我自悲  
作客喜逢賢地主今宵杯至總難辭

不禮金仙禮玉晨

雲笈七籤正月四日朝玉晨君

人間差覺傲精神倘來

事業慙青鬢未了名心爲老親花笑喜逢初番信酒香偷  
釀隔年春相將且盡筵前醉位置置吾儕豈在人



十四夜趙舍人秉淵招集酒後借步燈市

何用樂人海所得惟友朋況復美清夜人月輝華燈花園  
錦障妙歌舞不如尊前聽吳語天廚玉饌觴綠醪不如促  
坐嘗南烹月圓未圓月逾皎春深未深春更好眼芒旋落  
酒暈奇談綺烘成燭花巧紛紛上座先得詩罰依金谷我  
不辭酒腸窄已成小戶文陣怯敢當偏師半酣起踏六街  
去十萬銀龍落星樹香車寶馬如流泉華心未灰撩更然  
酣嬉遊冶不足道養得性情猶少年分手銅街曉鐘起今  
歲今宵樂如此

聞釋存丁母憂

故人新廢蓼莪篇我亦臨風尺涕懸同作浪遊因母養今

知難得是親年絳帷昨侍文宣講大被曾隨宗少眠自視  
生平愧猶子束芻難致路三千

爲撫孤雛力已殫與君兩小識辛酸冰霜只合顏常駐消  
息驚聞膽竟寒一日尙存休滅性千秋有業抵承歡阿蒙  
吳下還依舊他日登堂欲拜難

烏巖圖歌爲李秋曹威作

烏爾何來爾胡不向朱門大第啄梁粟又胡不向荒郊敗  
豕飽腸肉胡爲只向蒼蒼之林幽幽之山亂石犖确飛泉  
潺湲蕭涼幽闌人世不爭處爾乃烏烏啞啞下上於其間  
爾亦不畏羽林彈爾亦不接行人丸爾亦不坐秦氏桂爾  
亦不萃曾參冠飛飛不出此山裏朝飛向日晡飛還巢中

老鳥畢逋尾一年生有八九子子出望子歸得食聲則喜  
嗟爾烏爾昔初作黃口雛張口待食爲爾心力痛今乃羽  
翼成長羣飛叫呼爾今反哺爾樂何只且林之深兮翳不  
疏山之娟兮腴不枯下有一人愴然臞平生慕烏愛烏而  
敬烏效烏反哺烏不孤聽我歌作烏巖圖

題李南礪啖荔圖

李名文藻歷任廣東知縣今將同知桂林

嶺南吏隱足清娛親與仙人解絳襦前有東坡後南礪他

年合作兩髯圖

李多髯

枝頭風露飽璠漿不噉酸甜噉色香白足蠻童唱天半摘  
來應勝黑衣郎

我最清儂不自由何年眞作海南遊多公更訪炎州桂此

味還當進一籌

又題其曝書圖

積帙晴窗偶一開手披魚粉出秦灰願分太古九枝日更  
曝胸中萬卷來

根柢辭章古難合儒林循吏況兼諸誰從杜庫曹倉外想  
見先生所見書

移官只載中郎竹去越何來陸賈金見說賣書方就道知  
君不負十年心

將遊西山道中寫望

花風十里漾晴暉行畧平原擁翠微兩載城中勞挂笏今  
朝馬首快攀幃穿林客聽離畱住上塚人騎款段歸除卻

天邊塵一縉江南風景亦依稀

帝里烟花已倦吟得閒聊復快登臨  
漸來車馬無聲處忽與雲山有會心  
曉日金浮琳宇亂濃春青潑塞垣  
深此閒大有蒼深境明發芒鞋仔細尋

夜宿西山下偕馮九健一

杖策相從似夙因草堂促膝意相親  
春山無伴應憐我村酒能沽更泥人  
牆下雲根連洞壑樹梢簷角掛星辰  
向禽有願終當了只要天公許乞身

入山至戒壇

一峯蹲怒獅突補山口缺度峯十八轉  
轉轉得奇絕森疑仙園排杏望化城列  
雲木散巖澗風水糾洞穴一徑辨懸

雷丈枉尺以折行人如螳緣樹杪乍明滅眾峭忽一束前  
山豁焉裂中藏法王宮締構一何傑金碧欲動搖隨山現  
凹凸遐哉何王構人巧覺山拙入寺生晝寒聞梵了塵熱  
眞戒如我傳終辦領禪悅

登千佛閣

珠閣望岌巖飛甍切星漢正對兩崖開百里羅几案迢遙  
俯

帝京鬱爲神皋冠星星辨金紫隱隱開宮觀蒼然五陵色  
天風吹不散歌鐘閒車馬喧聲徹雲半一掬人海波飛沙  
浩無算三折流渾河怒決奔雲亂萬弩攢流澌半玦隱遙  
岸羣山太行來出塞青不斷佳處一縈結復此丹閣煥憶

昨鳳城頭旦晚支頤看今茲遂登臨彌愴星物換夙抱出世心對此能無歎拍檻如可騰吾期從汗漫

戒壇四松歌

我聞靈巖異松號千尺西來聖僧曾手摩蒼官本自足仙骨更愛佛地棲枝柯今之四松毋乃似閱盡四朝同剎那以靈慧種植淨土法雲甘露滋其和怒張牙爪斲獅象俯受戒律儕祇陀千劫不壞如立鐵一絲莫罍無緣蘿戒壇高已出雲半茲松直欲捎星河只疑四海龍排空行雨如投梭忽然天風度花雨飄何多吹香滿院飯僧徧沈沈古殿鳴春鼉山深夜永足精魅翻經倒幢誰敢訶定知我佛幻此等游戲怖走百怪除么麼不須菩薩作變相鬪體繞

身同綴螺不須金剛怒努目手揮長劍塵羣魔但教此松  
屹立一萬古那怕竊鉢來旬波戒神千百對此盡讐息諸  
天星衛空駢羅交枝靜巢說法鳥偃蓋下蔭聽經鶯香廚  
寶藏鎮相守厯久龍性全消磨亦憑佛力得降住不然久  
已騰擲變化歸無何

足疾發不得登極樂峯

茲峯不合名極樂遲我登臨坐緣薄臥游且覓宗少文未  
到中年病腰腳山中猿鶴休見啗髀肉已生心未灰此情  
惻愴誰得似如閱寶山空手回

移家來京師

豈是逢時料偏從陸海居田園更主後兒女累人初四海



謀生拙千秋作計疏  
暫時聯骨肉邸舍結親廬

全家如一葉飄墮朔風前  
事竟同孤注心還戀舊氈  
妻孥賃春廡雞犬運租船  
差喜征帆好相逢澤路邊

長安居不易莫遣北堂知  
親訝頭成雪兒驚領有髭  
烏金愁晚爨白粲困朝糜  
莫惱啼鴉切憐伊反哺時

江鄉愁米貴何必異長安  
排遣中年易支持八口難  
毋須怨漂泊且復話團圞  
預恐衣裘薄難勝薊北寒

當代朱公叔

謂筭河先生

憐才第一人傳經分講席  
傍舍結比

鄰桂玉資浮產盤餐損俸緡  
移家如可繪差免作流民

貧是吾家物其如客裏何  
單門餘我在萬事讓人多  
心跡嗟霜梗生涯辦雨蓑  
五湖三畝志經得幾蹉跎

都門秋思

樓觀雲開倚碧空上陽日落半城紅  
新聲北里迴車遠爽氣西山拄笏通  
閣倚宮牆拈短笛閒經坊曲避豪驄

帝京欲賦慙才思自掩蕭齋著惱公

四年書劔滯燕京更值秋來百感并  
臺上何人延郭隗市中無處訪荆卿  
雲浮萬里傷心色風送千秋變徵聲  
我自欲歌歌不得好尋騶卒話生平

五劇車聲隱若雷北邙惟見塚千堆  
夕陽勸客登樓去山色將秋邁郭來  
寒甚更無修竹倚愁多思買白楊栽  
全家都在風聲裏九月衣裳未剪裁

側身人海嘆樓遲浪說文章擅色絲  
倦客馬卿誰買賦諸

生何武漢稱詩一梳霜冷慈親髮半飢塵凝病婦炊爲語  
遶枝烏鵲道天寒休傍最高枝

贈陳秋士

吾儕一聚散造物巧掄弄君昔遊燕初河梁一相送輾轉  
三年閒合此離襟縫我今客作家君猶作鄉夢相依若性  
命相愛儼伯仲我識君苦淺君視我殊眾連牀燭一枝入  
市轡雙控歡意與淡俱交情爲貧重前衢溢華驄後巷飛  
絲鞵置身塵熱區心兵按不動君性更簡夷談言每微中  
能於廣座中一語寂羣鬪風致菊豔霜詩境梅破凍蓮思  
火地開蘭擬幽谷種何物可贈君騷香爲君誦更感拜母  
情助以菽水供投布識范寒分金補顏空相對茅檐中酣

歌時擊甕爲樂會幾時小別得毋恫膠漆雖不離蹇距孰  
爲其各曰有親養豈免爲人用君得賢主人羣籍互穿綜  
時爲四庫總校楊  
懋珩延校官書 得淥乃泛藁非高詎棲鳳所幸我輩交  
不貴屢過從聚非青蠅集散異市兒哄脫閒命駕來相期  
恕疏縱

偕王秋塋張鶴柴訪菊法源寺

懊惱心情薄醉宜討秋剛趁晚涼時今年何事堪相慰不  
遣黃花笑後期

佛地逢人意較親灌畦老叟面全皴於今花價如奴價可  
惜種花人苦辛

身離古寺暮烟中歸怯秋齋似水空暝色上衣揮不得夕

陽知在那山紅

懷映垣內城

冷雨疏花不共看  
蕭蕭風思滿長安  
虛堂昨夜秋衾薄  
隔一重城各自寒

送趙渭川歸羅浮

燕山九月北風厲  
殘客紛紛整歸騎  
誰復能爭豎子名  
可憐短盡長虹氣  
君亦告我歸故林  
我爲君作還山吟  
還山之樂樂曷極  
誰使天南客天北  
目斷飛鷺嶺上雲  
心枯玉女峯頭石  
朱明霞氣成樓臺  
彩衣鳳子迎君來  
夢成好續師雄後  
書就還教葛令裁  
如此家山信堪戀  
君倘不歸我亦勸  
我作長安送客人  
何時亦了還山願  
此去山中多白

雲莫從眾裏苦嫌身，倘逢過嶺梅花使，好訊荆高市上人。

聞鄭誠齋先生主講崇文書院寄呈二首

講院風連曲院清，蕭閒巾履恣經行。湖干花鳥參經座，橋

下龜魚識杖聲。送酒恰逢賢太守

謂邵閻谷先生時守杭州

論文偏愛

老諸生。人倫風鑑饒辛苦，不爲龍門一代名。

浪遊京洛困塵縑，慙愧生平國士知。梁苑鄒枚空綴賦，韓門郊島例窮詩。每多未了嗟生拙，敢以無才說數奇。常共衰親向南望，手拈香瓣話恩私。

送毛佩芳明經歸遂安

家臨清練足詞源，魯趙論詩舊業尊。才喜正平逢薦鶚，仍驚東野賦聞猿。道心已長琴三疊，世態頻傾酒一樽。先著

歸鞭君計得白沙翠竹滿江村

九月初二日曉雪

九月卽飛雪悲哉北地寒風愁傾碣石冰欲合桑乾濁酒誰同貰征衣我最單蕭條眇衢巷何似在長安

重九夜坐偶成

香甜飯飽粟千房病眼看花也自黃五度客經秋九月一燈人坐古重陽霜蟲頻訴夜寒壁鄰樹忽飄風過牆還向衰親添笑語恐驚時節在他鄉

偶遊僧舍見有題惡詩於壁者姓名與予同戲作  
慕蘭何曾效馬卿小冠子夏偶同名不妨姓氏供人借只怕詩篇過客評門戶文章雙李益清明寒食此韓翃生平

未賦瀟湘景，廁鬼無煩爲不平。

夜坐示施雪帆

不嫌蓬華共蕭辰，對榻經旬意較親。  
笑我在家仍在客，與君憂病勝憂貧。  
虛傳薊北黃金賤，自別江南白髮新。  
幸有一椽堪寄傲，底須狂趁六街塵。

丹黃舊業掩行滕，欲寫長箋研簇冰。  
繞座殘花猶影壁，打窗乾葉似窺燈。  
飢來客尙憐窮鳥，癡絕人還笑凍蠅。  
襪被依依兩無寐，昨宵寒思已難勝。

再疊前韻

等閒憔悴過花辰，藥裏吟囊強自親。  
金盡豈憂才共盡，家貧爭奈學尤貧。  
頻驚吳下酒徒散，冷笑長安弈局新。  
藉爾



璚枝慰飢渴不教腸胃久生塵

鎮日抄書展篋膝吟髭撚盡欲凝冰霜清已白邊頭草秋  
老先青壁上燈坐怯臨窗塵似馬居嫌近市客如蠅蕭蕭  
風色愁如許不聽燕歌已不勝

送温舍人汝适歸廣州

舍人弱冠登華省雞樹翩翩鶴棲影紫薇直退書自抄紅  
藥吟成燭猶秉長安甲第如雲高但覺舍人官獨冷將金  
作勁玉作寒似鳳聲清鶴聲警前身合是羅浮花吹送寒  
香過庾嶺我昔獻賦來田閒骨節疏頑性孤鯁片言脫口  
眾已驚一詩投門君獨肯開樽下榻百不嫌勸學分餐一  
何幸閒披墨妙登寶臺快接談源助修綆雅量如君有幾

人對君自失波千頃十日關晤如經秋四載彌留共清景  
朝來黃氣忽上眉告我

君恩許陳請三百名中未見收八千里外將歸省我在長  
安屢送人只有送君殊耿耿交情豈復爭聚散天意有如  
僧合併君去江南只半程卻過吳蒙舊鄉井憶別君應念  
故人移家我已同浮梗里中亦有數子才

謂雅存心雄語淵如

健氣力猛扁舟倘作半日停乞爲寄聲勞引領吳天遙拍  
楚水長嶺樹平開越山靚一路題詩到海南定比來時更  
道整未能免俗期丁寧後歲來看曲江杏

丙申冬于王述菴通政齋見鄺湛若八分銘天風  
吹夜泉研爲作歌今翁覃谿先生復出鄺書洗研

池三字揚本與研銘合裝屬題池在廣州光孝寺  
廊讀書處也先生視學廣東曾訪之

海雪天風夜泉研昔在瑯琊座中見酒酣詩成飛雪片山  
鬼湘娥來變眩今晨北平學士堂八分三字懸中央方知  
此研所洗處亦有巨筆含風霜字較研銘數浮二分尺殊  
量體同製磊磊撐天拄地形涓涓桂懼荷衣淚相傳讀書  
處乃在訶子林沈沈禪窟森晝陰一池黝碧映深刻至今  
雨浴風辭不敢相欺侵輕勻麝煤搨蟬翼載以星輶返京  
國忽然一夜天風吹此研此書成合璧嗚呼畸人身後仍  
有神遺蹟解付千秋人泠泠哀玉扣之若我應欲問二琴  
無復存我詩再鼓筆不振點畫空以指爪捫倘分一滴池

中澗墨花怒捲垂天雲

輓李南礪

去年隨計上

皇都四十功名半刺初經術其知推次仲文章誰薦似相  
如壁開墨褪初來札篋裏塵封未竟書貧累一官拋歲月  
名山回首重欷歔

吾道頻年氣死灰海陽新塚亦成堆

謂戴東原

幾曾白髮窺晨

鏡忍向青山覓夜臺瘴癘多時消病骨蠻荒終古殉奇才  
一棺百粵歸何計可有同官爲醜財

惡疾驚聞似照鄰夢桑生井亦前因

年四十八

瀕危尙遺千言

牘作傳都歸一代人

臨終時神清甚作遺囑以傳誌詩詠之事分屬某某皆得人

桂嶺

生祠爭涕淚蓬山舊隱已荆榛終知身後名何益羨爾逍遙獨反眞

叢竹圖爲金光祿素中題

金兄弟三人圖以寓意

脩竹本嘉植一根生百叢上枝棲祥鸞下根盤游龍金家三兄弟友愛出天性翩翩聯雁行亦如竹斯盛是用取乎竹手栽都作林中有屋數椽並坐還聯吟憶昔誦風詩未究作詩旨葛藟生河濟東楚流揚水杖杜葉漣漣棠棣華韡韡亦或譬艸木于斯胡闕諸君乃廣詩義作此叢竹圖竹以叢益茂叢則竹不孤我爲徵竹典開元有遺事苑竹數十叢牙筍不相離感彼同生心名竹係以義彼生帝王家豈與士夫異它曰孝曰慈殊軌亦同致方知此圖作用

意與古期田氏稱同根謝家賦連枝瓊芳而蕙茂蘭發斯  
玉暉較之此圖中彼皆成濫詞況君伯仲閒不我眾人遇  
示我華萼篇勝披連珠樹梧桐識相徵杞梓重文譽會看  
嶰谷材飛聲作韶濩披圖意未已益我長咨嗟譬如特生  
竹隻影誰周遮轉傷末俗偷本撥傷萌芽莫慘然豆其莫  
怪歌梅花同氣且如此遑復論其他我願舉世人家產一  
叢竹俾看枝葉茂相與感心目更吹比竹聲塤箎和相逐  
三歎還君圖此願何由足

題汪民部秀峯詩集

積寸心香裊玉糝雪青霞紺見瑰辭水曹例合歸風雅武

庫才應領度支

頃從工部  
轉戶部

金石文章關掌故炎琴姬扇感

心知時方集刻一編自有千秋在餘事分明亦我師

閨閣詩

輓毛明經佩芳

生別不經月凶音忽到門竹閒杯尙在石上坐餘溫起起

今年夢來來何處魂芙蓉城作主樂矣復奚論去時借吳

同舟云初病時便夢坐石案判事旁有披髮

孝廉蔚光

二僮侍已後日光常瞪如像設狀數日而卒

一領明經薦類沾入洛塵厭煩常刺促失意更艱辛黃卷

冬日書悶

智不周身似挈瓶且營斗室養黃寧商量紙價添窗榻料

理薪材暖竈徑雨滴槽牀傾蟻白霜消屋瓦現螺青飯餘

好趁南榮曝怕有人過喚掩扃

疊韻呈筇河先生

家具寒餘煖足瓶曉披盞簡捉青寧澀詩挽舸衝奔瀨險  
夢驅車度絕陁林杪雪粘烏項白寺門山映佛頭青街東  
幸有談空叟不待披衣已叩肩

曉晴三疊前韻柬徐惕菴

曉看微凍解銀瓶怪底宵來睡思寧簾角日拖西陸尾牆  
頭山走太行陁冷淘半盞楊花白凍飲三升竹葉青問訊  
南州老詞客一篇詩就一敲肩

三忠祠

在東便門外祀諸葛武侯岳武穆文信國

羣公元氣在星辰我識三忠是一身太息同聲悲國步蕭  
條異代識宗臣若徵史傳言徒贅略近祠堂草不春多少



樓臺費金碧此閒風雨暗承塵

漢吉羊洗歌在程魚門編修齋頭作

同作者蔣新甫翁潭溪兩

先生吳穀人陳伯恭兩編修

說文羊祥字通訓證之元嘉刀銘始

銘曰宜侯王大吉羊

今聞吳門

陸超曾復得漢時吉羊洗始知隸釋言非誣漢器惟多紛

莫紀吉祥卻用吉金鑄銘文耿耿出殊理

吉作尚羊作市

各輸一

畫作薤垂獨別諸家出波詭旱吉倒置方寶甌

甌文吉作昂

洋

祥混書古老子

古老子祥作彰與古尙書洋字同文

此同繆篆非古文亦復

新奇堪備體我聞洗制尙三尺承盤滌爵秉周禮如壘受

斛徵有圖鱗蹙花翻鑿在水周製渾淪多不銘陽嘉紀年

書兩耳上陽宮出亦有字長宜子孫誦詞美曰富貴昌宜

侯王用意差與吉祥比尙嫌錯雜麟駝形卻於銘義了無  
似同文合意斯獨精於眾洗中得觀止雙關略比爵象鵠  
百罰非同貞模兕流傳彷彿神靈呵想見摩挲土花紫更  
聞天子用金諸侯銀茲之銅用大夫是彼稱富貴侯王云  
等屬紛紛諛詞爾疏經自有虎觀儒吉羊洗歌歌止此

三疊夜坐韻

一年已過雁秋辰惻惻窮交久更親不學耕偏愁歲儉欲  
歸樵卻怕山貧寒深老屋燈逾瘦病起閉門月倍新散帖  
半牀休檢點愛它鼠迹滿凝塵

更無新醞倒黃滕愁對簷牙一尺冰試汲井花清眼膜要  
分蘭氣養心燈苦吟繞屋如旋蟻醉墨書牆忽散蠅杜甫

荒齋茅牘幾再經風後恐難勝

題施錫蕃雪帆圖四疊前韻

歸帆一葉阻霜辰忽忽披圖意與親急雪溪山同寂寞孤  
舟天地入清貧欲隨塞雁兼程去早趁江梅照眼新此景  
休嫌太悽絕可知不到軟紅塵

素友寒宵展畫牋分明呵筆欲成冰

圖者余少雲

添君風雪三

更夢老我江湖十載燈紙上歸心爭快馬圖中冷意辟癡  
蠅不知此願何由遂擁鼻吟成恐不勝

筍河先生見次原韻復疊二首

誰言詩客動星辰若解憐才與我親一任人嗤難作客藉  
非公在肯言貧諸生聽講談皆進老輩論文樣不新自擁

書城掩關坐不知門外有車塵

笑口何因忽破滕敲詩如碎一盤冰梧桐葉盡人聽月薛  
荔陰空鬼拜燈五夜吟風麤砌蟀頻年鑽紙效窗蠅他時  
倘蠟登山屐負橐相隨力尙勝

六疊前韻和余少雲作

故交零落感參辰青眼相逢訝許親雪後我方連日臥客  
中君亦舉家貧消愁酒醒愁依舊疊韻詩多韻斬新尙有  
狂名堪作達不憂甌釜慣生塵

隨身畫幃共吟滕閣得燕山一窖冰廿載行藏羞滅刺兩  
家骨肉笑圍燈避人偷作文彈鼠厭俗頻將劒逐蠅莫話  
單寒向行路季裘雖敝尙能勝

王述菴先生招集蒲褐山房觀劉貫道蘭亭禊飲

圖作歌

卷尾書至元六年  
春中山劉貫道畫

永和觴咏誰能繼蒲褐山房夜高會  
羃屐都饒晉代風  
流本屬王家事酒酣燭樹光模糊潑眼見此蘭亭圖悠然  
坐我此亭上和風清氣來吹噓橫綉七尺何不有中山劉

郎寫生手名士爭摹馬渡餘苦心爲落龍眠後

李伯時亦有禊飲圖

見畫譜

亭陰背山面流水亭中主客竟誰是倚欄一老觀鷺

羣渺然若逢情所欣吾知此是王右軍一人偏右岸巾幘  
若爲蒼生動顏色不絲不竹情不歡此是東山謝安石一  
人據案坐上風若欲自命爲文雄彷彿應是孫興公當年  
作詩復作序似在慘淡經營中其餘醉醒行坐亂無次一

一皆具點睛勢或吟或飲或笑噱不一雷同各生氣最後  
一客依修篁擁虎皮坐神激揚脫非謝散騎合是袁龍驤  
四十二人盡名彥何必皆詩皆有傳士女空誇洛水游旌  
旗卻笑華林宴古來文謙此獨尊亦憑此畫方傳神後來  
貫道圖裕陵隆準日角龍爲真真龍貌得猶易易能貌此  
者嗟何人我聞伯駒先時亦有作吾家文獻歎錯愕語見黃文  
獻集跋趙伯駒謂其纖毫微密極盡神試較龍眠定何若那  
得三圖風雨倏合并各出精靈門強弱不須望古窮幽探  
筵前名士皆東南我公文章經濟赫爲

盛時出不比典午末造無益惟空談後來好事作真蹟莫  
畫當年畫今夕

雪意

非因裘薄更衾單坐不生溫臥豈安先冷指尖如有信忽  
生膚粟似無端膽瓶欲逗冰花坼獸炭微疑火暈寒豫屬  
兒童休擁篲階前畱得盡情看